

東

華

錄

東華錄

雍正三

臣王先謙敬編

臣周澹蕃恭校

秋七月己卯諭駐紮西甯辦青海事務兵部左侍郎常壽據貝子延信奏報親王羅卜藏丹津貝勒益蘇克汪扎爾等率兵四千搶奪王額爾得尼厄爾克托克托柰等爾宜遣人勸阻令其和好若羅卜藏丹津藉此侵犯邊塞則不可不加懲治此事或爾親往和解或遣賢能官員喇嘛等往彼和解爾悉心籌畫與年羹堯商酌而行○壬午以恆德本錫俱辦理藩院侍郎事俱由理藩院郎中遷○實授年希堯廣東巡撫○癸未雲南巡撫楊名時奏巡撫衙門規禮共有五萬餘兩准畱若干其餘應充公用諭督撫羨餘豈可限以科則拘以繩墨惟視秉心何如耳取所當取而不傷乎廉用所當用

東華錄

雍正三

而不涉於濫固不可廢削以困民亦不必矯激以沽譽若一切公用稿賞之需至於拮据窘乏殊失封疆之體非朕意也必使兵民溫飽官弁豐足督撫司道亦皆饒裕乃朕之所願是在爾等揆情度理而行之其是與否自難逃朕之鑒照也○甲申諭禮部國家祀典必貴潔誠先農壇每歲展祀且爲親耕藉田之所最宜清肅舊制園壇內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備修理聞康熙四十年間內務府撥給園頭耕種桑盛蔬菜無所從出惟向市中採買殊非潔淨精誠之意今著園頭清還地畝仍給太常寺壇戶耕種以供祭祀之需餘地一千五百畝著將內外園壇查明丈尺每種地十畝估計令其修牆若干務期加謹葺護毋致傾壞每年派滿漢太常寺少卿一員不時稽察庶壇壝精潔祀事更加虔謹

矣○命工部供造貢院內應用桌椅等器不許借用五城民間之物以滋擾害○遣官赴盛京江西湖廣糴米運京師○丙戌諭大學士等總督巡撫保題官員與例不合者部議不准行甚是其應否照伊所請補授朕自另降諭旨朕亦看保題官員之人何如耳如恣意徇私妄行保奏朕斷不准行 皇考當日亦是如此○工部議覆川陝總督年羹堯疏奏布隆吉爾地方北連哈密西接沙州去嘉峪關約五百餘里請建城一座屯兵駐守則柳溝赤金始得屏捍應如所請從之○丁亥命軍前官弁升補本旗省員缺遺員署其事○戊子諭內閣前因年羹堯奏稱趙之壇情願捐銀一萬兩往布隆吉爾地方築城效力朕念趙之壇係功臣之後若伊才具不勝知府之任道員事簡易辦捐銀敘用似屬可行若趙之壇才克勝任卽畱知府用見今趙弘燮虧空庫銀三四十萬兩交

與趙之壇料理又何必另外捐銀況年羹堯啟奏築城已有張連登王之樞等可以竣事今復遣往效力議敘似又開一捐例斷不可行若布隆吉爾築城張連登等所捐之貲不克完工今年羹堯密摺具奏再將情願效力者發往此朕從前諭旨也爾等票籤全不符合將朕緊要語句俱行遺漏爾等俱係 聖祖仁皇帝委任大臣 聖祖仁皇帝天縱生知兼之臨御日久諸事精熟爾等舛錯之處全賴 聖祖仁皇帝改正所以不至誤事今朕臨御之初內藉大學士外藉督撫提鎮理應諸事勤慎盡心協辦如前日本上脫落一字事雖甚小然不得謂小事便可輕忽本章用心細閱自無錯誤又如前日蔡珽所奏之事卽係年羹堯奏過之事爾等又票該部議奏朕疑其或有異同照籤批發及觀部議仍是一事何至玩忽如此朕若亦如爾等玩忽督撫本章概批依議用人一

途聽之九卿隨意保舉豈不省事但爾等可以負朕朕何忍負我
皇考之深恩乎況朕於爾等陳奏虛心採納並未有偏執之處
人非聖賢孰能無過爾等若能指摘朕過朕心甚喜改過是天下
第一等善事有何繫吝以箱結爲老成以退諉爲謹慎非朕所望
於爾等之意也○以史貽直爲吏部右侍郎由內閣學士遷○命征勦西
藏臺灣有功員弁身故者均予議敘著爲例○己丑諭戶部朕自
臨御以來勤求民瘼事無鉅細必延訪體察務期利民而於徵收
錢糧尤爲留意惟恐閭閻滋擾此念時切於懷如江西省有漕米
各州縣運糧到省又自省倉搬上軍船故有腳耗扒夫修倉補墊
等項編載全書歷來支給已久自康熙二十三年部中誤駁不准
支給行令追還嗣後一例駁追究無完解至三十四年 聖祖仁
皇帝特頒諭旨將從前已經支給者俱免追賠恩至渥也至康熙

三十八年部議又以腳耗與扒夫等項分晰未清仍令扣追不知
腳耗乃貼運之總名扒夫等項乃支給之細數實一事非兩項也
自康熙三十八年至今二十餘載應追銀五十一萬餘兩米六十
一萬餘石積累增多究無完解追比日久官民均受其累朕知之
甚悉特諭爾部將從前積欠盡免追賠向後准其支給副朕加惠
黎元體恤有司之意○諭署撫遠大將軍貝子延信爾遣書與額
爾得尼厄爾克托克托柰等稱欽奉諭旨青海台吉皆係顧實汗
之嫡孫自我朝 太宗皇帝時顧實汗與達賴喇嘛和好恭順效
力至今百年蒙我 皇考施以恩寵加封名號普加庇護後經策
妄阿喇布坦敗壞黃教圍困西藏殺害拉藏且復謀侵爾等於是
我 皇考遣發大兵同爾等送達賴喇嘛至藏振興黃教今羅卜
藏丹津無故稱兵以王等不入伊黨自相侵害朕仰體 皇考眷

念願實汗子孫之意其罪未明尙不忍卽加征討已遣侍郎常壽
往問羅卜藏丹津所行情事若羅卜藏丹津知罪悔過朕當定其
是非和解爾眾仍令爾弟兄照舊居住青海如果羅卜藏丹津不
遵朕旨侵犯邊塞豈可不遣兵征剿今王之屬下人等盡被搶擄
窮困投至甘州朕聞之不勝惻然特遣郎中通智辦給王公並屬
下人等廩餼牲畜令從豐厚王等在彼安住不須憂慮朕斷不使
爾等稍有拮据也可如是往諭並譯蒙古文發往○庚寅諭倉場
侍郎糧運關繫國儲必須進行無阻始得及早抵通自楊村至通
州河道多有淤淺糧船起剝每致耽延以致回空凍阻並誤新漕
著該督嚴飭坐糧廳查看河道有淤淺處作速挑濬深通毋使阻
滯並知會天津總兵官用心催趕且天津一帶地方向有販賣私
鹽等弊糧船不許停泊火速趲行直抵通州至通後速行起卸交

倉母得需索抑勒苦累軍丁朕去年親自閱倉知漕運過壩一晝夜可五萬袋可見交卸甚易爾等加意督催務使空船早得回南新漕亦可無誤漕務一事朕親身閱歷纖悉洞知爾等儻不盡心料理或因勒索致有遲延責無所諉○辛卯諭禮部朝鮮國歸我朝以來恪盡藩職進貢年久在 太宗文皇帝 世祖章皇帝

聖祖仁皇帝時屢次施恩將伊國貢物減免今所貢物尙多此內若有可減去者爾部會同內務府確議具奏再加減免以紓朝鮮民力尋議朝鮮貢物嗣後請酌減布八百匹獺皮百張青鼠皮三百張紙二千卷從之○頒賜朝鮮國王李昫段匹及使臣李穡等賞賚有差停止筵宴 上召使臣李穡進見諭曰爾朝鮮國王啟疆東土於我 太宗文皇帝時誠心豫附恪守藩封我 太宗文皇帝 世祖章皇帝視同一家恩施優渥爾國王祖父亦能仰承

厚澤奉職惟謹百年於茲矣我 聖祖仁皇帝化成久道萬國來
王念爾國君李焞幼繼嗣服光紹前猷權不下移惠能撫眾數十
年來職貢匪懈用是 隆恩異數寵眷有加賚予便蕃貢物頻減
病則賜之以珍藥歿則錫之以榮名 特遣近臣優頒奠弔今朕
續承大統爾嗣王李昫遣爾恭進賀表朕嘉爾嗣王忱惻肫篤又
念爾係嗣王宗族特行召見以示優禮爾歸告爾嗣王繼乃祖父
之緒夙夜黽勉慎守綱維毋替厥服長爲屏翰不忘恭順克殫忠
誠朕必體 列聖怙冒宏仁俾爾遠藩保安於永久爾其識之
○壬辰禁出差官騷擾地方州縣官託名私派○總理王大臣等
議覆給事中碩塞奏八旗都統印信清文係固山額真字樣額真
二字所關甚鉅非臣下所可濫用應請改定以昭名分將固山額
真改爲固山昂邦伊都額真改爲伊都章京八旗印信改鑄從之

○署撫遠大將軍貝子延信奏額爾得尼厄爾克托克托柰之子阿拉布濟索諾木達什來稱與賊人交戰相拒六七日賊人退去領兵五百及其妻子共一千餘口來投等語臣已遣往額爾得尼厄爾克托克托柰處居住報聞○癸巳諭下五旗諸王毋許私派所屬旗人多供差使擅自苛虐治罪○派滿洲御史稽察八旗事務○甲午諭大學士等史書務紀其真而史才古稱難得蓋彰善癉惡傳信去疑苟非存心忠厚學識淹通未能定得失於一時垂鑒戒於久遠也有明一代之史屢經修纂尙未成書我 聖祖仁皇帝大公至愼之心旌別淑慝務期允當惟恐幾微未協遂失其真鄭重周詳多歷年所冀得良史之才畀以編摩之任朕思歲月愈久考據愈難目今相去明季將及百年幸簡編之記載猶存故老之傳聞未遠應令文學大臣董率其事慎選儒臣以任分修再

訪山林績學之士忠厚淹通者一同編輯俾得各展所長取舍折衷歸於盡善庶成一代信史足以昭示於無窮著將滿漢大臣等職名開列具奏○諭工部沿河州縣向有額設河夫自百名至數十名不等興工則併力濬築工停則分遣巡防損者隨補塌者隨培修搶擁護俱係熟諳夫役故雖偶有衝決不能爲患近聞管夫河官侵蝕河夫工食每處僅存夫頭數名遇有工役臨時雇募鄉民充數塞責以致修築不能堅固損壞不能隄防冒銷誤工莫此爲甚嗣後著總河及近河各省巡撫嚴飭河道不時稽察按冊覈實禁絕虛冒儻有仍前侵蝕貽誤河防者卽行指名題參○伊忒海緣事革職調吳爾泰爲盛京兵部侍郎常壽爲戶部左侍郎以伊都立爲兵部侍郎由詹事遷○以牛鈕爲兵部右侍郎由左副都御史遷○王昭度以病免以李紱爲兵部左侍郎由左副都御史遷○以李鳳翥署

兵部左侍郎

由鴻臚寺卿署

○以薩哈布在軍前命爲額外侍郎調登德

爲禮部左侍郎轉尹泰爲工部左侍郎以薩爾納爲工部右侍郎

仍兼左副都御史○

以鄂托拜爲內閣學士

由給事中遷

○己亥奉天

將軍唐保住奏虧空錢糧各官應照數追完得旨將軍唐保住將

虧空錢糧之存住等參奏甚是歷年以來諸臣不知感戴皇考

寬厚慈祥之恩轉以侵盜國帑勒索小民之事視爲故常玩法已

甚不可不隨時整理此案保已往之事是以但加申飭儆三年之

後仍復如是斷不寬宥爾等宜深悉朕心凡事須秉公辦理○辛

丑頒聖祖欽定孝經衍義○壬寅以隆科多王碩齡爲明史監

修官徐元夢張廷玉朱軾覺羅逢泰爲總裁官○甲辰以涂天相

爲內閣學士

由詹事遷

○丙午諭諸王大臣及內外文武各官朕維自

古帝王治化隆盛中外臣民頌禱情殷故天保之詩卷阿之什往

往有之我 聖祖仁皇帝御極六十餘年深仁厚澤超邁百王臣
工黎庶無以致其感激愛戴之誠每於 萬壽聖節京師暨直省
各建道場誦經祝壽今朕嗣位之初夙夜祇懼所以立政圖治者
安能及 聖祖之萬一爾諸臣工於朕誕日儻仍照從前建立道
場則此後將成定例在京王公及部院等官未免從事靡文稽遲
公事在外文武大吏亦恐科派屬員貽累地方且以有用之財供
無益之費旣非朕以勤儉勵有位之心又非朕以康阜期海內之
意甚無取焉特宣布中外於朕誕日毋得建立祝壽道場但冀內
外諸臣各殫厥心勉襄化理以慰朕宵衣旰食之焦勞卽不啻天
保卷阿之祝頌矣若不遵諭旨朕必加以處分不少寬貸○諭禮
部湖南士子赴湖北鄉試必經由洞庭湖湖水浩瀚無涯波濤不
測六七月間風浪尤險聞有覆溺之患朕甚惻然或致士子畏避

險遠裹足不前又非朕廣育人材之意今欲於湖南北方建立試院每科另簡考官俾士子就近入場永無阻隔之虞共遂觀光之願明年二月爲鄉試之期爾部即可行文湖南巡撫若能於二月之前豫備場屋則於明春卽分湖北湖南兩闈考試儻爲期已迫豫備不及則於下科舉行至於湖廣通省取中原有定額今旣分兩闈其取中之數應如何分別之處著湖南湖北巡撫公議湖廣總督從公酌定具奏○命尙書侍郎等官每日一人輪班奏事密摺封進○以岳色爲左副都御史由翰林院侍讀學士遷○是月免陝西平涼等廳州縣衛所康熙六十年旱災涼州古浪所屬大靖雹災直隸東明縣康熙六十一年水災額賦有差

八月戊申朔李英貴緣事革職以法敏爲總督倉場侍郎由直隸巡道遷○己酉加上 列祖 列后尊諡○諭鹽政約束商人循禮安分

嚴禁奢靡僭越○諭各省關差及崇文門稅務嚴禁胥役勒索阻滯○庚戌御史孫塔等題參戶部事件違限得旨從前戶部堂官將部中事件累百壅積怠玩不理自怡親王辦理戶部事務於展限四十日之內一切積弊剔除殆盡獎勵屬員清理數千案件甚屬可嘉即使偶然遺漏一二小事不但無庸議處其清理如許事案當應議敘察議之處著從寬免至御史孫塔等以逾限題參如此方是凡勤敏效力之人偶有過失姑從寬宥其權在朕大學士亦不得徇庇情面草率歸結至於戶部職掌皆係銷算會同稽攷錢糧之事較於別部加倍繁多非如銓選地方員弁等項可比似應稍展限期得細加察覈於事更有裨益著都察院科道將戶部事件展限歸結之處另行定議具奏尋議嗣後戶部辦理事件其本部題覆者於原限三十日外加增十日其行查會稿各衙門者

於原限三十日外加增十日如逾限不行完結照例查參永著爲例從之○甲寅諭兵部提督總兵副將等官仍照舊例不許在任所置產入籍其參將以下俱係微員任所縱有房產諒亦微薄若概勒歸原籍必致困累爾等會同九卿定議具奏尋議參將以下等官任所置有產業或本身休致事故解退或經身故子孫畱任所有欲在彼入籍者許令地方官報明督撫卽准其入籍居住田土丁糧與土著之民一體輸納從之○召連肖先來京以高成齡署山西布政使由按察使署○乙卯兵部議覆巡視臺灣御史吳達

禮奏諸羅縣北半綫地方民番雜處請分設知縣一典史一其淡水係海岸要口形勢遼闊請增設捕盜同知一應如所請從之定諸羅分設縣曰彰化○丁巳 上親書 景陵碑匾復命誠親王溥親王及翰林官善書者恭寫一幅隨召九卿及南書房翰林一

併敬閱諭 景陵碑匾事關重大誠親王溍親王素工書法朕已令其恭寫翰林中善書者亦令其恭寫朕早蒙 皇考庭訓做學

御書常荷嘉獎今 景陵碑匾朕亦敬謹書寫非欲自耀己長

但以大禮所在不親寫於心不安爾諸臣可公同細看不必定用朕書須擇書法極好者用之方愜朕心諸臣奏曰 御筆之妙天矩自然而仁孝誠敬之意流溢於楮墨之間正與 陵寢大事相

稱 聖祖仁皇帝在天之靈實爲欣慰○戊午以兩廣總督楊琳專管廣東總督事以孔毓珣爲廣西總督仍兼巡撫事由廣西巡撫遷○

己未恭上 大行皇太后尊諡曰 孝恭宣惠溫肅定裕贊天承

聖仁皇后頒詔天下覃恩有差○福建巡撫黃國材奏服色僭越請分別嚴禁違者以僭妄治罪 上諭奢僭之弊朕亦稔知但陋習因循一旦遽然禁止若非立法嚴峻有犯無宥不能使之永遠

遵奉揆之於理移風易俗宜漸不宜驟究以從容不迫爲貴爾等姑且徐徐勸導誘掖維持儻仍不改革然後嚴爲定制以法繩之耳○庚申禁官民人等服用五爪龍紗段○癸亥添設歸化城理事同知一○定朝陽門外新建倉曰萬安倉設滿漢監督各一○甲子巳刻 上御乾清宮西煖閣召總理事務王大臣滿漢文武大臣九卿入面諭曰我 聖祖仁皇帝爲 宗社臣民計慎選於諸子之中命朕繼承統緒於去年十一月十三日倉卒之間一言而定大計薄海內外莫不傾心悅服共享安全之福 聖祖之精神力量默運於事先貫注於事後神聖睿哲高出乎千古帝王之上自能主持若朕則豈能及此也 皇考當日亦曾降旨於爾諸臣曰朕萬年後必擇一堅固可託之人與爾等作主必令爾等傾心悅服斷不至貽累於爾諸臣也朕自卽位以來念 聖祖付託

之重 太祖 太宗 世祖勦垂大業在於朕躬夙夜兢兢惟恐
未克負荷向日朕在藩邸時坦懷接物無猜無疑飲食起居不加
防範此身利害聽之於命蓋未任天下之重也今躬膺 聖祖付
託神器之重安可怠忽不爲長久之慮乎當日 聖祖因二阿哥
之事身心憂悴不可殫述今朕諸子尙幼建儲一事必須詳慎此
時安可舉行然 聖祖既將大事付託於朕朕身爲 宗社之主
不得不預爲之計今朕特將此事親寫密封藏於匣內置之乾清
宮正中 世祖章皇帝御書正大光明匾額之後乃宮中最高之
處以備不虞諸王大臣咸宜知之或收藏數十年亦未可定諸王
大臣等當各竭忠悃輔弼朕躬俾朕成一代之令主朕於爾等亦
必保全成就篤厚恩誼豈非國家天下之大慶乎朕意若此諸王
大臣其共議之諸王大臣奏曰 皇上聖慮周詳臣下豈有異議

惟當謹遵 聖旨 上曰爾諸臣既同心遵奉諭旨朕心深爲慰

悅乃命諸臣退仍畱總理事務王大臣將密封錦匣收藏於乾清

宮正大光明匾額後乃出○兵部議敘陝西四川雲南官兵平定

西藏功得旨平定西藏乃自古未至之絕域所以 皇考曾有從

優議敘之 旨況 皇考當春秋高邁備兵於極邊宣揚威略峻

德鴻功允垂億萬斯年之美政也此一次議敘軍功前固無例可

援後亦不得爲例將軍延信著封爲貝勒兩路率領八旗官員進

剿之將軍等著給與世襲三等阿達哈哈番參贊大臣給與拜他

喇布勒哈番副都統營總等給與拖沙喇哈番其護軍校驍騎校

給與頭等功牌二面仍加一級綠旗官員經大將軍等咨送冊籍

頭等者照攻取打箭鑪功加一倍二等者功加一等三等者功加

二等至於滿洲漢軍綠旗之外委官俱係一體效力人員無論由

部委外委概行從優議敘以仰副我 皇考恩綸特沛從優議敘
之 諭旨○乙丑 孝恭仁皇后梓宮發引 上恭送至 景陵
啟鑒○丙寅兵部議敘福建官兵克復臺灣功得旨臺灣地方自
古未屬中國 皇考聖略神威取入版圖逆賊朱一貴等倡亂占
據臺地 皇考籌畫周詳指授地方官員遣調官兵七日之內剿
除數萬賊眾克復全臺 皇考當春秋高邁威揚海外功德峻偉
官兵感戴 皇考教養之恩奮勇攻取甚屬可嘉固不必援引前
例後亦不得爲例茲仰副 皇考從優議敘之曠典官員見行議
敘功加外著概行各加一級總督滿保雖有失陷地方之罪但一
聞事發卽親往廈門撫慰眾心遵依 皇考指示調遣官兵七日
之內克復臺灣滿保著兼兵部尚書職銜提督施世驤統領大兵
徑渡海洋鼓勵將士屢經大戰擊敗賊眾七日之內克復臺灣厥

功甚大施世驃著給與世襲一等阿達哈哈番總兵官藍廷珍曾協助施世驃著給與世襲三等阿達哈哈番水師營副將許雲失陷臺灣非關伊罪奮勇前進多殺賊眾身又陣亡著給與世襲拜他喇布勒哈番參將羅萬倉遊擊游崇功俱係陣亡著給與世襲拖沙喇哈番總兵官歐陽凱著追贈太子少保參將林亮著給拜他喇布勒哈番遊擊董芳守備何勉俱著給與拖沙喇哈番○己巳發帑遣官賑喀喇沁等處饑○庚午侍郎常壽奏七月二十二日抵親王羅卜藏丹津駐牧之沙拉圖地方恭宣諭旨令伊等兄弟罷兵和睦羅卜藏丹津訴稱戴青和碩齊察罕丹津額爾得尼厄爾克托克托柰欲霸占招地捏言我遣使準噶爾欲同策妄阿喇布坦背叛是以眾台吉等不服會盟與兵並備言戴青和碩齊等過惡擬起程渡河與決勝負臣察其情勢難和好據察罕丹津訴

稱羅卜藏丹津與兵逐額爾得尼厄爾克托克托奈於內地今勒令眾台吉聚兵於巴爾托羅海處意欲獨占西招青海地方兵約不過一萬二三千名其黨率多勒從若渡河前來定卽力拒又據眾蒙古告稱羅卜藏丹津勒令眾等呼伊爲達賴混台吉其餘台吉俱令呼舊日名號一概不許稱呼王貝勒貝子公封號細揣其意先滅額爾得尼厄爾克托克托奈再滅察罕丹津獨占青海會同眾台吉奏請賞伊汗號踞占招地遙管青海顯然可見至問遣往準噶爾處使人音信據云準噶爾以青海人等不足憑信又云準噶爾兵丁已至噶斯口前九月內可至青海等語得旨此事甚大行在總理事務王大臣議政大臣詳議並發往在京之總理王大臣議政大臣等會同詳議具奏○辛未 上謁 暫安奉殿

孝陵

孝東陵遙詣

景陵至

享殿躬奠奉

孝恭仁皇后梓

宮安於享殿○諭王大臣等 皇太后素性謙謹事 聖祖仁皇帝數十年恪恭罔懈見今 享殿內奉 聖祖仁皇帝梓宮 皇太后梓宮暫安奉於 薦殿一應供獻及祭文不可由中門出入俱應於西門行走以仰體我 皇妣謙沖至意○召入 陵寢官員諭曰 聖祖仁皇帝鹵簿之內備鞍馬匹向在御廄俱曾經皇考乘騎應送至達里剛愛交與福壽敬謹牧養俾之終老若有私自騎用及抵換者事覺卽行正法○甲戌總理王大臣等議奏羅卜藏丹津久懷異志糾眾盟誓 皇上念伊祖願實汗恭謙敬順不卽加罪特遣侍郎常壽前往和解羅卜藏丹津不聽欲與戴青和碩齊察罕丹津交戰又私稱爲達賴混台吉殊屬背逆應調西甯兵俟羅卜藏丹津渡河時於渡口邀截其後至松潘兵丁請令提督岳鍾琪帶領前往就近應援以張聲勢其西路軍務應行

文年羹堯詳議辦理從之○常壽奏親王戴青和碩齊察罕丹津
領兵與羅卜藏丹津相持勢難抵敵率妻子屬人一百四十餘名
來至河州老鴉關外臣卽令其進邊居住其餘人眾令伊寨桑管
束邊外防守要隘報聞○丙子諭各蒙古王貝勒貝子扎薩克台
吉塔布囊等自爾先世歸附 太祖 太宗蒙被聖化於茲五六
代矣世締國姻恩深祿重兄弟主臣洽比保聚安居樂業百有餘
年其間厄魯特噶爾丹猖獗弄兵破喀爾喀七旗侵及內扎薩克
蒙古蹂躪遊牧之地 皇考爲爾等三次自將出師乃滅噶爾丹
使爾等永享太平之福六十餘年以來爾等屬下偶有饑饉災傷
莫不發帑與糧資給畜牧更派富戶屯田代耕使饑者復安散者
復聚 皇考養育爾等蒙古恩澤重矣大矣曩者郭爾羅斯以歲
饑聞朕仰體 皇考聖意卽遣大臣前往發倉賑救賞給牛羊今

喀喇沁翁牛特各旗又以歲饑聞復遣大臣前往卽速查明饑口
動用正項錢糧買米散賑夫一時阻饑朕雖賑之常年貧乏之民
在爾各君長於本旗內裒多益寡互相調卹以養育之庶幾得所
耳若仍然厚斂重徭納之於阨危之域使之至於散亡孰爲爾等
納賦孰爲爾等供徭愛民惠下是第一要務不可不知也連歲災
旱頻仍今年又遭饑饉爾等各子其民者如何減賦如何輕徭如
何裕其農功如何孳其畜牧爾等王貝勒大臣等議定務使各得
生理以仰副我 皇考聖心以慰朕心定議之後儻有顯背公議
仍然重賦苛役者國法具在非朕所得而私也我 皇考目覩爾
等長成愛如子孫事事包容處處軫恤爾等視 皇考如祖父恃
皇考之慈愛每事懈逸朕新卽位務須各盡爾職謹慎小心管
轄屬下訓練兵丁嚴禁盜賊奉公守法循分安生仰報我 皇考

軫愛之恩俾朕得以仰法 皇考慈惠爾等至意始終保全永永勿替朕之願也今日特於 皇考梓宮前諭爾等知之

九月丁丑朔葬 聖祖仁皇帝於 景陵 孝恭仁皇后祔龍輅

入 寶城時諸王大臣及各官見祥雲五色自西北起覆於 景

陵繚繞不散 上回鑾○己卯 上還京師○庚辰 聖祖仁皇

帝 孝誠仁皇后 孝昭仁皇后 孝懿仁皇后 孝恭仁皇后

升祔 太廟是日恭上 孝誠仁皇后尊諡曰 孝誠恭肅正惠

安和儷天襄聖仁皇后 孝昭仁皇后尊諡曰 孝昭靜淑明惠

正和欽天順聖仁皇后 孝懿仁皇后尊諡曰 孝懿溫誠端仁

憲穆奉天佐聖仁皇后○辛巳以升祔 太廟禮成頒詔加恩中

外○壬午調田從典爲吏部尙書張廷玉爲戶部尙書以張伯行

爲禮部尙書調景日珍爲戶部右侍郎以王景曾爲禮部左侍郎

禮部侍郎行走

○以盧詢爲刑部尙書高其佩爲刑部右侍郎

由光祿寺卿遷○

以涂天相爲刑部左侍郎

由內閣學士遷

○甲申諭京尹謹行鄉飲酒禮

○戶部議覆直隸巡撫李維鈞請將丁銀攤入田糧內應如所請

於雍正二年爲始造冊徵收得旨九卿詹事科道會同確議具奏

○丁亥諭八旗都統等查驗器械國家定制從前查驗時彼此那

借及租賃弓矢枝梧掩飾朕所深知著寬限一年各將器械修理

完備朕於明歲十月間遣大臣會同兵部一日查驗一旗封貯公

所再驗一旗將二十四旗悉行據實驗存交還各旗各自收貯庶

免那借租賃之弊○裴律度請捐俸工銀助賑 上不許○發帑

賑扎魯特饑○己丑常壽奏羅卜藏丹津攻察罕丹津已渡黃河

命年羹堯備兵擒勦○以原任廣東布政使王沛愷爲太常寺卿

原任湖北布政使張文燦爲太僕寺卿○庚寅禮部尙書覺羅蘇

庫以病乞休允之○辛卯命須洲巡視河務以博爾多署山東布

政使

由戶部郎中署

○壬辰免江蘇太倉等衛逋賦○癸巳命纂修律例

○乙未諭大學士等朕近於聖祖仁皇帝所遺書笥中檢得未

經頒發諭旨一道以明太祖崛起布衣統一方夏經文緯武爲

漢唐宋諸君之所未及其後嗣亦未有如前代荒淫暴虐亡國之

迹欲大廓成例訪其支派一人量授官職以奉春秋陳薦仍令世

襲朕伏讀之下仰見我聖祖仁皇帝海涵天覆大度深仁遠邁

百王超軼萬古朕思史載東樓詩歌白馬商周以來無不推恩前

代後世類多疑忌以致歷代之君宗祀殄絕朕仰體聖祖如天

之心遠法隆古盛德之事謹將聖祖所貽諭旨頒發訪求明

太祖支派子孫一人量授職銜俾之承襲以奉春秋祭享但恐有

明迄今年代久遠或有奸徒假冒致生事端爾內閣大學士卽會

同廷臣詳明妥議以副 聖祖仁皇帝寬仁矜恤之至意○詔停
本年秋決○除紹興府情民丐籍○丁酉諭內閣世襲官員所得
三品廕生內有願在武職行走者仍賜以應得原品其內外廕生
監生等到部考試繙譯書法再分派各部行走令伊等咸得勉力
學習至世襲官員所得三品廕生內若考試有列優等者仍著奏
聞賜以所應得原品如此則伊等必痛自砥礪以求上進不但國
家得有用人才足供任使卽各部院衙門亦不至令無知子弟羣
廁其間率意肆行爲眾人所譏議矣○以李鳳翥爲內閣學士由鴻臚寺卿遷○戊戌九卿遵旨議覆直隸巡撫李維鈞請將丁銀攤入地
糧徵收應令該撫確查各州縣田土因地制宜作何攤入田畝之
處分別定例庶使無地窮民免輸納丁銀之苦有地窮民無加納
丁銀之累得旨巡撫李維鈞條奏丁隨地起一事九卿並不據理

詳議依違瞻顧皆由迎合上意起見卽如本內有地窮民一語既稱有地何謂窮民不與有米餓殍之語相似乎不但此也凡九卿會議理應將所議事件預先詳審至臨議時各出己見平心靜氣公同商榷以求至當邇來九卿坐班多有不齊及至會議彼此推諉不發一言或假寐閒談遲延累日令一二科道新進者倡言於眾便羣相附和以圖塞責在九卿遲延一日內而六部八旗外而各省俱因以遲延矣以此爲居官安靜及至保舉議行事件又有請託賄賂等弊爾等在 聖祖時皆受 深恩不圖實心報效每事迎合有時依議准行便爲迎合得計遇有駁回事事件雖加嚴飭又謂上有深意以此事君負恩殊甚此皆朕之所深知而不忍見者 聖祖與 天相似諸臣豈能以人意揣度 天心所有種種惡習皆在 聖祖洞鑒之中包涵已久有何益處朕卽位以來將

此等惡習概置不究爾等自揣平日所爲亦當知懼亦當知感矣
今仍欲迎合朕意於諸事本無成見有何迎合之處所發會議事
件原欲與眾共商卽書所云汝則從龜從筮從卿士從庶民從之
意也元首股肱誼同一體朕止欲諸弟盡爲賢王諸臣盡爲良臣
事事當理卽朕意耳朕從不自以爲是所議尤當朕卽不從不妨
面折廷諍再三執奏卽不顯言亦可密摺敷陳至爾等以堯舜比
朕朕果能上法堯舜乎抑屬贊頌之詞也如或不能正可因此自
勉卽爾等亦當上法古名臣也 聖祖良法美政布在方策朕與
爾等期共相勉以臻至治朕宵旰勤勞爾等可圖安逸乎嗣後
宜洗心滌慮痛改前非凡事皆持公正止論是非毋事揣度朕實
心延納果能據實直陳豈肯拒阻若仍蹈前轍朕或據理飭行或
擇人另議爾等豈不自愧乎原本發還九卿著仍照戶部議行○

己亥以李鳳翥署工部侍郎

由內閣學士署

○移湖北襄陽府同知駐樊

城○庚子以田文鏡署山西布政使

由內閣侍讀學士署

○辛丑解傳澤潞

任訓王朝恩爲浙江布政使加大理寺卿銜以圖理琛爲廣東布

政使

由兵部郎中遷

○總理王大臣等議准署山東布政使博爾多奏東

充一區周方數千里請照舊例復置一鎮設總兵官一駐兗州府

以資彈壓從之○予故戶部尚書王鴻緒祭葬○壬寅諭會試總

裁官中額外如有佳卷選出另奏其落卷照今春例覆檢○癸卯

劉相緣事革職以噶什圖爲刑部右侍郎

原任陝西巡撫

○金應璧緣事

解任以楊汝穀爲左副都御史

由通政使遷

○實授范時捷陝西西安

巡撫○甲辰湖廣總督楊宗仁奏百姓食鹽價值應請

欽定下

慰商民仰望得旨據楊宗仁奏請欽定鹽價伊並不體察事理但

固執己見仍照原題具奏夫士農工商雖各異業皆係國家子民

理當一視同仁督撫偏袒百姓巡鹽御史偏袒商人可乎總督係地方大臣凡辦理事務必須平心靜氣期於合理楊宗仁身爲總督於此等處並不留意混行瀆奏著黃叔琳謝賜履前往楚省會同楊宗仁將鹽價確議酌定謝賜履印務著運使何順暫行署理○乙巳諭大學士等人臣膺命效職果能實心愛民清白自矢則官去民思甘棠畱詠有愈久而不能忘者從古有之若今之生祠書院不知始自何人自督撫提鎮以及監司守令所在多有究其實不過該員在任之時或係屬員獻媚或係地方紳士逢迎甚至有出入公門包攬詞訟之輩倡議糾合假公派費占地興工以致園囿亭臺窮極華麗勞民傷財一無顧惜營造之後或爲宴會遊玩之場或本官竟據爲產業果係官去民思不忘遺愛特爲興建者甚少此事向曾禁止而踵弊如故應加嚴飭嗣後如有仍造生

祠書院或經告發或被糾參卽將本官及爲首之人嚴加議處其見在之生祠書院如實係名宦去任之後百姓追思蓋造者准其存畱其餘俱著地方官查明一概改爲別用或爲義學延師授徒以廣文教如此則以無用爲有用惜民財力杜絕虛浮於地方風俗大有裨益○理藩院奏陣亡台吉進達克蒙恩優恤伊子噶爾馬孫多布等謝恩得旨蘇尼特王垂濟拱蘇隆旗下台吉管理旗務官進達克帶領屬下兵丁與逃竄之厄魯特羅卜藏錫拉布等鏖戰身亡甚屬可嘉此並非出兵之時亦並未令其率眾追擒而伊奮勇前往臨敵致命是以朕交部議敘部議二等台吉加一等授爲頭等台吉具奏朕特降諭旨施恩將進達克照依公爵致祭今襲頭等台吉進達克之子噶爾馬孫多布著授爲輔國公○丙午諭內閣朕惟我太祖高皇帝天錫智勇肇造鴻基太宗文

皇帝續業恢圖丕昭聖武 世祖章皇帝統一寰區功成治定其
時內外文武勳舊臣工勘亂效力茂著厥功 皇考聖祖仁皇帝
特敕內閣翰林院諸臣纂修三朝國史用揚 列聖之鴻謨並及
諸臣之勞勩迄今尙未編輯矧惟 聖祖仁皇帝垂統六十餘年
以守兼創 恩澤聲教遠及海外絕域 德業之盛超於百世凡
於指授所及能顯立功勳誠敬任事之大臣與夫軼羣出眾有才
之人若不博採聞見薈萃成編恐閱世久遠或致闕略著將我朝
國初以來文武諸臣內立功行間誠敬任事卓越之才有應傳述
者行文八旗將諸王貝勒貝子公以及文武大臣之冊文誥敕碑
記功牌家傳等項詳加查覈暨有顯績可紀者亦著詳察逐一按
次彙成文冊悉付史館刪去無稽浮夸之詞務採確切事實編成
列傳如此可以垂之萬世庶爲國家宣力有功之大臣不至泯沒

矣○以永福爲左副都御史

由給事中遷

○賜果郡王允禮銀一萬兩

冬十月丁未朔

聖祖仁皇帝御製律歷淵源一百卷刻成分三

部一曰歷象考成一曰律呂正義一曰數理精蘊 上敬製序文

○戊申川陝總督年羹堯奏羅卜藏丹津忒肆猖狂臣領兵於九

月二十日自甘州起程十月初至西甯相機行事授年羹堯爲撫

遠大將軍改貝勒延信爲平逆將軍○辛亥諭兵部驛站關緊重

大經朕屢加嚴諭然其閒積弊難以盡詰有在官之累有在民之

累如直隸山西等省差徭更爲浩繁雖驛馬足數亦供應不敷乃

內而兵部外而驛道於給發馬匹時官吏通情受賄往往所給浮

於勘合之數且行李輜重皆令驛卒乘馬背負多至八九人不等

所到州縣以見馬換馬向有舊例不敢詰問至督撫提鎮經過之

處更惟命是從嗣後照勘合之外有敢多給一夫一馬者許前途

州縣卽據實揭報都察院以聽糾參如甲縣容情不揭而被乙縣揭報者並甲縣一併治罪其督撫提鎮騷擾驛遞者皆照此例庶少甦在官之累至若河南山東諸省離京稍遠謂耳目易欺每驛額設馬匹不過十存三四其草料工食仍照舊例開銷且逐年詳報倒斃侵蝕補買之價差使一至則照里科派將民間耕種牲口強遣當差令其自備物料跟隨守候種種累民尤屬不法著該地方督撫將所有驛站徹底清查缺額者勒限買補至派借民間牲口尤當勒石永禁違者卽從重治罪○壬子諭總理王大臣等各處工程有請將俸工銀兩捐助者此事斷不可行伊等名爲捐助實則借端勒派擾累小民且直省大吏將已分內所得羨餘捐助完工者聽其捐助如或不能著奏請動用正項錢糧○鎮國公普貴因病解退封其子智保爲輔國公○甲寅命八旗病廢兵丁無

子弟可倚者給半分錢糧終其身○敘平郭羅克賊番功封年羹
堯爲二等公給岳鍾琪拜他喇布勒哈番世職升兵賞賚有差○
禮部遵旨議奏八旗直隸各省孝行節義之人例得請旌給銀建
坊恭遇 皇上彰善大典卽鄉曲貧民勿令湮沒又以節婦年逾
四十而身故者守節已歷十五載以上亦應予旌又酌設祠宇入
於祀典請敕下八旗直隸各省督撫學臣採訪查報一體予旌其
設立祠宇應令順天府奉天府直隸各省府州縣衛每處建二祠
一爲忠義孝弟之祠建於學宮內祠門立石碑一通刊刻姓氏於
上已故者設牌位於其中一爲節孝婦女之祠另擇地營建祠門
外建大坊一座亦標題姓氏於其上已故者設牌位於祠中其八
旗分左右翼擇地各建二祠每年春秋二次致祭直省交與各府
州縣衛所官兩翼交與大宛二縣至於建坊銀兩嗣後應行停給

如係有力之家仍聽其自行建造得旨孝行節義建立牌坊年久毀壞遂致湮沒今欲設立祠宇特爲昭垂久遠之意並非欲節省錢糧部議建立祠宇停給建坊銀兩不合建坊銀兩仍著給與餘如議行○裁雲南澂江府經歷其事務歸本府司獄兼管添設麗江府經歷一兼管司獄事○乙卯添設熱河滿洲理事同知一○戊午諭內閣九卿詹事科道等從來用人之道必兼聽並觀周咨博採方能允當而無失朕於選用人員勤加諮訪正以朕一人之耳目有限不若合爾諸臣之見聞始無遺漏也乃爾等僉云未能深知互相推諉夫百職在廷四方具集同鄉親故豈無見聞其賢者卽小善亦應稱舉不肖者卽小惡無容隱匿若知其賢而不言是謂蔽賢知其不肖而不言是謂黨惡卽如月選官內有劉尙儉者係四川夔州府參革貪酷知府劉天觀之子其父刻剝民膏爲

伊子捐職罪莫大焉如此之人豈可錄用在廷豈無一人知之者乃俱緘默不言以此推之可見知而不言者甚多爾等之意惟恐結怨於朋友不若徇情容隱自保功名雖誤朕選用之事而不顧貽害於地方而不恤試思得罪於朋友與見棄於君父孰重孰輕全一人之功名與貽地方之患害孰大孰小卽所舉之人爲賢爲不肖朕不過於引見時借以參酌自有裁奪並非責爾等保其終身無過致貽日後之累何必過慮乎嗣後務宜痛改積習苟有見聞卽從實舉出進賢勿避嫌退不肖勿避怨朕生平惟以真誠待人爾等亦當以至誠報朕尙其各抒忠悃勿負朕推心置腹之至意○禮部奏請將 文廟從祀先儒位次及各壇廟祭品祭器樂器逐一繪圖彙爲成書頒示天下從之○壬戌諭內閣親王郡王俱賜封號所以便於稱謂也如無封號之王貝勒在諸臣奏章內

自應直稱其名再小人等並將閒散宗室亦稱爲王又有貝勒王貝子王公王之稱嗣後俱著禁止○諭湖廣總督楊宗仁凡爲大臣者身任封疆重寄必當和平詳愼曲體人情虛懷博詢以求適中庶於國計民生俱有裨益近聞湖廣鹽斤湧貴良由減價太過所致在爾意原欲利民而不期先已病商乃致商運裹足不前眾口食淡是欲利民而民轉受其困矣至如楚地本產米之鄉素爲東南之所仰給因爾禁米出境以致川米亦不到楚不但鄰省價昂而本省糧價亦致漸長是爾之遏糴原欲封本境而本境之民並未沾毫釐之益也夫鄰省黔黎莫非朝廷赤子大臣體國當以公溥爲心似此偏執褊狹殊屬不諳大體其速行改圖務令販運流通遠近民食有賴○年羹堯奏前鋒統領蘇丹經事頗多岳鍾琪總統綠旗土司兵丁請授爲參贊大臣至青海之事並請侍郎

常尋一等侍衛達爾參議報聞○乙丑諭怡親王允祥等策妄阿喇布坦之來使將至朕亦欲遣使臣與伊來使同往將理藩院郎中眾佛保授爲內閣學士前去○諭大學士等國家建官分職於翰林之選尤爲慎重必人品端方學問純粹始爲無忝厥職所以培館閣之材儲公輔之器也從前 聖祖加意育才循循訓導又纂修各種書籍需員甚多故翰林院編修幾至二百人庶吉士亦五六十人朕臨御之初未有編纂諸事又未能如 聖祖之善於訓導誠恐人才置之閒散特多方錄用內而科道吏部外而道府州縣俱各隨材器使務令疏通今編檢尙有百餘人庶吉士尙有數十人著內閣大學士會同翰林院掌院教習秉公別擇其學問優長字畫端楷或精於繙譯國書者畱本衙門辦事及派各館纂修其或才具練達可當科道吏部之選或長於吏治編檢可道府

庶吉士可爲州縣者一一分別具奏至或老病衰廢願自解退者聽其原官休致其有行止不端事蹟確實者奏聞革退今朕特恩開科人材輩出將來揀選庶常朕當親加考試引見揀選至日後散館仍照舊例以三等分用目今正屆殿試之期朕深知向有擬送策聯鑽營甲第等弊殊可痛恨朕所點閱卷大臣俱係平日實心委任之人各宜虛公謹慎杜絕諸弊儻有仍蹈前轍者必嚴加處分務令文治日隆英才蔚起以副朕籲俊興賢之至意○丙寅諭總理王大臣等今年殿試天氣已寒諸貢士若照舊例在丹墀對策恐硯池冰結難於書寫著在太和殿內兩旁對策再傳諭總管太監置火鑪使殿內和暖諸貢士得盡心作文寫卷○諭理藩院厄魯特公茅海同伊伯王丹津阿拉布坦來時我皇考深加眷愛授爲公爵茅海今在軍前輸誠效力多年著授爲固山貝子

○羅卜藏丹津執侍郎常壽於堪布廟筆帖式多爾濟死之○丁卯諭部院八旗大臣等據副都統祁爾薩條奏從前滿洲遇有喪事親友饋送粥茶弔慰後風俗漸弛至多備羊豕大設肴饌送飯過事奢靡等語夫饋粥一事乃我朝滿洲醇樸之俗因其人篤於居喪至廢飲食親友恐其傷生特饋粥糜勸令少進並非設宴也此禮相沿至今失其本意竟至過爲侈費昔廉親王允禩值伊母妃之事欲沽取孝名詭爲孝行迨至百日猶令二人扶掖匍匐而行於定例外加行祭禮每祭焚化珍珠金銀器皿等物所費不貲半年後仍令人扶掖而行當日朕慮伊致殞其生深加軫惜再三慰勸及事畢見伊容體充肥略無衰損有識者多厭憎而譏議之敦郡王允禩郡王允禔貝子允禧三人相結指稱饋食大設筵席自初喪以至百日用羊豕二三十口備極肴品輪流饋送舉國

喧傳此眾人所共知者我 皇考洞鑒其情曾於眾阿哥會集時

諭云孝必本於誠心如欲邀孝名卽屬虛僞凡爲人子者不務

盡敬於生前而欲矯飾於歿後可謂孝乎以此指責允禩者屢矣

朕遭 皇考 皇妣大事惟遵 皇考當 皇祖考 皇祖妣大

事時所行儀禮不敢借稱盡孝稍有矯飾之處論語云禮與其奢

也甯儉喪與其易也甯戚朕前曾降諭旨著大臣等考稽喪禮定

爲儀節具奏尙未議覆茲朕欲援據典則揆情合義且期有裨於

旗人生計將副都統祁爾薩所奏准行但恐眾人謂朕抑制伊等

使居喪不得備禮有礙於子孫盡孝之心親友相關之誼是以躊

躇未定著各部及八旗大臣等會同詳議具奏尋議事親之道務

盡其誠我 皇上大孝格 天 聖祖仁皇帝 孝恭仁皇后大

事時哀感本於中心儀節協諸典禮此中外臣民所共知者若矯

飾邀名徒見鄙於有識禮云祭不欲數數則煩煩則不敬惡有不敬而可稱孝乎宋臣司馬光云居喪饋食或因親朋慮其不能成禮齋送粥糜往勞之若肥饌美臠致之者爲不義受之者爲不孝我朝甚重喪禮親友憐其廢食特饋粥糜蓋以人子居喪疏食飲水古之道也未聞大設筵席備具肥甘饋者不止受者不辭而猶得稱爲孝者伏讀 聖諭是非誠僞昭然共喻內閣九卿等已將婚喪等事分別條款奏准允行應如祁爾薩所請嗣後不得以饋粥爲名過情棄禮致失當年醇樸之俗違者查出參處得旨凡作僞飾節以取虛名朕平日所羞爲者且自 太祖 太宗 世祖

聖祖以來歷代相繼專務誠實撫天下之黎民登國家於平治無粉飾之政諸臣咸當恪遵我朝制度崇尚實行鄙薄虛名將兩次所降諭旨一併傳示八旗徧令遵行○年羹堯奏羅卜藏丹

津等聚集各台吉肆行邊外臣札令叉木多總兵官周瑛率兵截其往藏之路但羅卜藏丹津急卽遁至穆魯烏蘇等處亦未可定臣令靖逆將軍富甯安調都統穆森往吐魯番駐防調吐魯番駐防副將軍阿喇納帶領滿洲蒙古綠旗兵二千名由噶斯一路前往截殺若羅卜藏丹津實心恭順卽將此二千名暫住布隆吉爾再查布隆吉爾駐防兵甚少四圍皆係厄魯特喇布坦巴蘇泰每令伊屬下截奪臺站馬駝應令綠旗兵二千名調往布隆吉爾交參將孫繼宗管轄若用兵卽令率所管兵丁剿滅喇布坦巴蘇泰與副將軍阿喇納會合共截羅卜藏丹津如此賊人不能脫逃而布隆吉爾地方亦甚堅固奏入報聞○癸酉調徐元夢爲戶部尙書孫渣齊爲工部尙書以阿爾松阿爲禮部尙書○以尹泰爲左都御史調阿錫璲爲工部左侍郎以馬爾齊哈爲刑部左侍郎

塞楞額爲內閣學士

由少詹事遷

○年羹堯奏十月十九日賊人侵鎮

海堡都統武格率兵援救二十日厄魯特兵二千名番賊一千餘

人圍堡二十一日至二十三等日賊人陸續添兵日夜轉戰參將

宋可進等於二十五日往援賊人敗走共殺厄魯特六百餘人再

多巴之囊素阿旺丹津從前叛歸羅卜藏丹津今爲我兵擒獲理

應正法暫行監禁報聞○丙子 上御懋勤殿召讀卷官入詳定

甲第閱進呈十卷一一酌定大學士馬齊等奏曰 皇上加意作

人恩施格外落卷回避卷俱遣官校閱有善必錄罔有遺才士子

無不感服 上諭入閣各官爲國家宣力但子弟反不得應試殊

屬可憫考試回避諸生其永著爲例又諭曰國家取士大典原應

加意朕惟以至誠御下並非欲其感恩也卽如爾等大臣若以恩

意籠絡反爲輕視爾等朕平日行路從不輕踐人影左右近侍皆

所深知豈於大臣而肯輕視耶爾等能佐朕爲令主朕亦樂爾等爲良臣隨命讀卷官等坐賜茶畢 上回宮

十一月丁丑朔賜于振等二百四十六人進士及第出身有差○戊寅總理王大臣等議覆年羹堯奏羅卜藏丹津攻西甯之南川口我兵據中中堡賊人圍堡堡內囊素潛與賊通欲鑿牆而入守備馬有仁等奮力抵禦參將宋可進等率兵往援內外夾攻賊敗遁囊素助賊盡皆殺滅甘州兵少乞調兵三千名協駐以壯軍威查喀爾喀等散處遙遠應停其調遣就近派鄂爾多斯兵五千令副都統花色等帶領歸化城土默特兵五百令副都統查克旦等帶領大同鎮兵一千總兵官馬觀伯帶領前往甘州從之○庚辰總理王大臣等奏謁陵之禮始於東漢歷唐宋明皆間歲一行至於周年親謁陵寢未見記載我 皇上至仁大孝一歲之中兩謁

山陵孝思備摯見今冬至將近 聖祖仁皇帝配 天大典指

日恭行伏望 皇上以禮制情停止親謁於諸王內命一人恭代

得旨諸王大臣援據典禮勸止朕行姑暫停往謁今歲兩次躬送

梓宮地方百姓亦甚勞苦俟明歲清明親往恭謁○壬午以塞

爾圖爲兵部侍郎

原任吏部侍郎

○癸未年龔堯奏據隨侍郎常壽之千

總馬超羣等回稱常壽於初九日至羅卜藏丹津所駐巴顏布拉

克地方羅卜藏丹津云是月十五日我等在察罕托羅海地方會

盟再議十七日行至和爾地方薄暮時忽有二三千賊人突至將

侍郎常壽及輜重劫去筆帖式多爾濟憤賊陵辱拔刀自刎等語

常壽見被禁堪布廟中報聞○甲申大學士等檢舉誤票京口將

軍本章請交部議處得旨忠君愛國之心發於至誠凡事自不至

舛錯遺漏若但思竊位沽名趨利避害僥倖於萬一而於國家制

度政事輕重絕不加意茫昧失序豈不貽笑於世此等小事猶非所重但能各守君臣大義使朕不至恐懼疑惑便是國家之福朕之所望於大臣者於一切利欲之心勉自克制精白乃心維持國家大體統不使我朝君臣貽譏於萬世朕之所望足矣○禁止奸棍私販中國幼穉出口賣與蒙古關口官員兵丁不行查拏者分別議處著爲例○乙酉諭大學士等古制凡遇廟諱字樣於本字內但缺一筆恐未足以伸敬心昨朕偶閱時憲曆二月月令內見聖祖仁皇帝聖諱上一字不覺感痛嗣後中外奏章文移遇

聖諱上一字則寫元字遇聖諱下一字則寫煬字爾等交與該部卽遵諭行○賑浙江富陽等三十一縣衛所旱災饑民○丙戌年夔堯奏北川新城有賊二千餘踞住遊擊馬成輔擊殺甚眾副將王嵩參將宋可進等帶兵三千往援破賊六營賊敗走再莊浪

爲河西五府總路東西兩山俱番人遊牧地此內謝爾蘇一夥最
強厄爾布一夥助其行惡其地最險者係碁子山茨爾溝二處臣
調兵四千令涼州總兵楊盡信管領四面夾攻斬賊數百級俘獲
其妻子番賊奔入鐵保城生擒厄爾布賊首魯木受等二人謝爾
蘇賊首坎柱等六人審明正法臣見餘賊無幾將兵調回西甯得
旨嘉獎○丁亥以浙省秋旱折徵杭嘉湖三府漕米之半應徵米
色並令紅白兼收○年羹堯奏西甯北川上北塔下北塔二處蒙
古回子占地數百里丁眾糧裕素懷異志臣令千總馬忠孝前往
下北塔將三十村莊回目招撫馬忠孝等又帶兵一千往勦上北
塔擒獲頭目阿布多吳園厄爾克喀等正法餘回就撫報聞又奏
察罕丹津在河州居住羅卜藏丹津欲行劫擄臣令少卿花善帶
領察罕丹津妻子屬人移至蘭州居住報聞○辛卯諭理藩院據

大將軍年羹堯奏稱青海台吉索諾木達什在布隆吉爾地方由羅卜藏丹津處脫身來歸等語向者索諾木達什盡忠效力乃被叛賊羅卜藏丹津誘擒今聞伊已來歸良慰朕懷索諾木達什先與駐紮柴旦木地方之官兵一處效力繼又往西藏軍前竭誠報國深屬可嘉特沛殊恩著封爲貝子給與上等產業加意撫綏並著大將軍傳諭俾知朕意○癸巳年羹堯奏厄魯特番賊在新城堡等處往來劫奪臣調西甯總兵官黃喜林等領兵往勦羅卜藏察罕等賊共殺傷奇嘉寺逆賊五百餘喇嘛番子千餘獲賊目七器械駝馬牛羊無算因時值寒冷令黃喜林等撤兵回西甯報聞○甲午戶部議覆廣西總督孔毓珣奏粵西地方邊遠商人資本無多以致誤課誤鹽民憂淡食請動藩庫銀六萬兩令鹽道委員辦理官運官銷行之三年可以酌減鹽價從之○復設太常寺協

律郎一贊禮郎二司樂二〇丁酉諭內閣爲治之道在於務實不
尙虛名朕繼承丕基時刻以吏治兵民爲念事無大小周思詳慮
求其見諸施行實可以有濟天下者必下諭旨諄諄告誡中外條
奏有當理者無不嘉與採納所冀內外臣工實在遵行庶有成效
一年以來所降諭旨及內外條奏頒發於六部九卿八旗直隸各
省者亦已多矣內外衙門於奉到事件若不過行一文書出一告
示徒託空文竟不見諸實事則不徵不信豈朕倚毗相助爲理之
至意歟儻所降諭旨及條奏准行之事其中果有一二未盡允協
宜加損益者須據實入告候朕酌定總於來年十二月將各條各
款實在如何施行及行之如何成效條分縷晰明白奏聞〇諭禮
部 孔子道冠古今爲萬世師表薄海內外無不俎豆尊崇國學
乃四方表率其制尤重 聖祖仁皇帝臨雍釋奠典禮優隆朕續

承大統景仰先型羹牆如見念國學爲造士之地聖教所被莫先
於此恐歷歲旣久有應加修葺之處爾部會同工部詳加閱視凡
文廟殿宇廊廡及講堂學舍務須整理周備俾廟貌聿新以申景
慕朕將親詣焉○以金世揚爲工部右侍郎毛文銓爲貴州巡撫
由雲南布政使遷○戊戌諭內閣今科庶吉士散館滿漢試卷著吏部尙
書隆科多戶部尙書張廷玉禮部尙書張伯行禮部侍郎登德閱
看具奏從前已將庶吉士內揀選分用此內或更有才堪外任及
可任部員者爾等會同左都御史朱軾分別具奏朕思編檢庶常
乃清要之選必須文學優長人品端方始爲稱職若品行有虧雖
文藝可觀亦無足取至今歲所中進士爾等務悉心察訪必得文
行兼優之士擢爲庶吉士將來始可以收得人之效其第一甲第
一名于振著卽爲翰林修撰第二名戴瀚第三名楊炳卽授編修

二甲第一名張廷珩卽授檢討俱著在南書房行走○己亥撫遠大將軍年羹堯條奏進勦青海事宜一預備進勦兵丁請將陝西督標西安固原甯夏四川甘州大同榆林土默特鄂爾多斯巴爾庫爾吐魯番等處兵丁共揀選一萬九千名令提督岳鍾琪等分領從西甯松潘甘州布隆吉爾四路進勦一防守邊口土司兵二千名及西安滿兵五百名畱守西甯各邊口陝西撫標兵五百名防守永昌西安滿兵五百名防守甘州其布隆吉爾舊有兵一千名應仍畱駐防至副將張成龍見領兵五百防守巴塘其裏塘止駐兵二百請將四川撫標兵三百增添防守再令署松潘鎮副將張英副都統黑色領兵一千五百名出松潘口在黃勝關駐紮雲南提督郝玉麟領兵二千名駐紮又木多則羅卜藏丹津等斷不敢前往巴爾喀木等處一購買馬駝臣在陝西買馬一千匹甚不

數用請令在歸化城張家口採買或將太僕寺上都打布孫腦兒孳生馬匹解送三千匹巴爾庫爾挑送駝二千匹再於甘涼肅州等處採買一千五百則兵丁進剿之時可無貽誤一貯備軍糧臣在西安慮青海有事已豫買米六萬石將來自不至有誤一精練火器請將景山製造之火藥每駝以一百八十斤計算賞給一百駝於明年正內解送西甯得旨總理事務王大臣議政大臣會議具奏尋議大將軍年羹堯所奏進剿賊寇調遣兵馬堅守隘口備足糧餉等款均應如所請其所請馬數外再增一千匹解送至火藥於所請額數外增送一倍再行文郝玉麟卽由中甸帶兵前往又木多駐紮其中甸地方應令總督高其倬簡選總兵官一員帶兵五百名前往駐紮從之○辛丑冬至祀 天於 圓丘恭奉聖祖仁皇帝配享○諭王大臣等怡親王於 皇考時敬謹持身

廉潔立品未嘗圖利干預一事糾黨邀結一人所屬人員略無擾累其安分自守家計空乏舉國皆知朕素加崇獎自朕御極以來一心戴朕克盡臣弟之道所交事務悉效公忠亦眾所共知也查從前朕弟兄分封之例總計各得錢糧二十三萬兩朕欲援此例賜之王奏辭不已朕勉諭再四僅受十三萬兩而已再照裕親王例令支官物六年王又叩首固辭極其懇切朕欲以王之善表揚於眾且爲後日子孫模範故特諭諸王大臣今不允王之所請既不可得允王所請則超軼尋常實心爲國宣力之弟轉不得以諸兄弟應得之分賜之朕心實爲不忍著諸王大臣議奏○壬寅以聖祖仁皇帝配天禮成頒詔天下覃恩有差○以綽爾泰爲內閣學士仍畱軍前辦理糧餉

由翰林院侍讀學士遷

○總理王大臣等奏將

軍傳爾丹處兵丁旣派往巴爾庫爾阿爾泰地方未免兵少儻有

調遣應將祁里德所領之兵共合一處歸一人總統恭候 欽定
得旨兩處將軍儘有合行處著傅爾丹總統祁里德令在參贊上
行走○癸卯命八旗蒙古建官學○甲辰策妄阿喇布坦使臣根
頓等朝見 上召入諭曰爾台吉於 聖祖皇考時有獲罪之處
亦有效力之處爾台吉今悔過引罪朕甚嘉之所貢方物朕酌量
收納俟爾回日另降敕諭○乙巳諭王大臣等前將怡親王奏摺
交王大臣等議奏王又屢次奏辭力求允其所請朕尙難於酌定
想王大臣等自難定議今俱著照所請以副王謙抑之懷朕另行
加恩將見在王所兼管之佐領俱令爲王之屬下賞給一等護衛
四員二等護衛四員三等護衛十二員加賜豹尾槍二長桿刀二
每佐領下添給親軍二名以此加恩於王卽遵諭旨行○諭大學
士等向來庶吉士學習清書散館之後每至荒廢殊爲可惜嗣後

清書散館之翰林不可令其荒廢今年新科進士選拔庶常朕意學習清書者少派數人令其盡心學習務期通曉散館後亦不可荒廢或在翰林或在部曹卽令與滿員一同繙譯如此方實有裨益新科進士於引見之前朕欲先行考試知其學問再行引見選拔庶人才不至遺漏目今天氣寒冷一應仍照殿試豫備考試題目朕將詩文四六各體出題視其所能或一篇或二三篇或各體俱作悉聽其便○是月免浙江安吉仁和湖州杭州等五十三州縣衛所旱災額賦有差

十二月丙午朔諭八旗官員等老安郡王居心不正諂附輔政大臣又自恃長輩每觸忤 皇考蒙 聖德寬仁始終容宥而伊諸子全不知感不務竭誠效力馬爾渾經希吳爾占等弟兄之間互相傾軋競事營求色亨圖亦妄冀得爵讒害骨肉此眾所共知者

安郡王諸子之中馬爾渾係應襲封王爵之人似屬安分其子華
玘尙無劣蹟而天絕其嗣封爵虛懸是以 皇考審擇其人躊躇
有待乃安郡王之子孫遽生怨望吳爾占色亨圖等至屢形於辭
色夫國家恩施詎可倚恃而強邀今廉親王以不襲封安郡王之
故讒閒宗室搖動該王屬下人等之心以累世仰受 太祖 太
宗 世祖 聖祖施恩之舊人豈肯被伊引誘遂其擾亂若強欲
令朕襲封安郡王則朕從容施恩之本念俱不可行矣將襲封安
郡王之本章發回不准承襲其屬下佐領著俱撤出另賜他人○
戊申以軍前效力封厄魯特貝勒額駙阿寶爲郡王台吉沙畢多
爾濟爲貝子喀喇沁一等塔布囊噶爾馬色楞札薩克一等台吉
沙克都爾扎布俱爲輔國公餘升賞有差○命旗員因公革職者
免當勞苦差役及挑取烏槍馬甲私罪仍照舊例○己酉命九卿

於新科進士內有居家孝友人品端方者各舉所知親識亦不必
回避○分湖北湖南鄉試額湖北中式五十名副榜十名湖南四
十九名副榜九名武舉各二十五名○添設刑部見審司辦理在
京八旗命盜及各衙門欽發事件○予故福建水師提督施世驤
祭葬諡勇果贈太子少保○庚戌禮部議覆御史田嘉穀條奏各
省學政科考生員舊例用四書題文二篇請增用經題文一篇以
崇經學如遇三冬日短減去四書文一篇從之○壬子拉錫希布
以老疾乞休加侍郎銜致仕以巴錫爲內閣學士原任甘肅按察使○調
朱綱爲湖南布政使鄭任鑰爲湖北布政使○吏部奏舉人揀選
知縣每逾三十年不克及時試用除見在已經截取赴部者聽其
照例銓選外其餘無論已未揀選之員除本科外應行令直省督
撫每於鄉試事竣會同主考官秉公驗看凡年力精壯克勝吏治

者給文赴部銓選其年老及才具平常者雖已經截取俱准於本籍具呈改授敎職歸班銓選從之○予故原任禮部尚書陳銑祭葬諡清恪○癸丑年薨奏王察罕丹津屬下厄爾克扎爾固齊阿爾塔爾和碩齊拉布木三人將羅卜藏丹津看守伊等賊兵殺散帶領一千餘戶口來投貝勒色卜騰扎爾帶領青海左翼公冊零之弟吉巴爾珠爾等妻子並屬下人二千餘口來投臣卽宣諭 皇仁赦其被脅從逆之罪安插於西川口外報聞○甲寅解佛格任調阿爾松阿爲刑部尚書由禮部調○丙辰諭內閣每日條奏甚多朕覽訖或交王大臣等議奏或交九卿或交該管處議奏至於日久朕安能一一記憶凡朕交議事件內與前奏有重複者卽行奏聞若事雖相似而所陳有更詳悉者仍行定議具奏○年羹堯奏察罕丹津之壻喇卜坦寨桑巴圖等屬下一千四百餘戶及

丹忠屬下七百餘戶俱從羅卜藏丹津處脫逃來投仍令往原處
居住報聞○戊午年羹堯奏墨爾根戴青拉查卜之子察罕喇卜
坦旺舒克喇卜坦二人率眾來投云我父墨爾根戴青拉查卜聞
大兵前來逃往巴爾喀木地方再堪布諾門汗亦率屬人來投查
墨爾根戴青拉查卜與羅卜藏丹津併力搶掠察罕丹津情屬可
惡已令察罕喇卜坦遣人喚回伊父俟到日審明請旨堪布諾門
汗係邊口內塔爾寺喇嘛乃察罕丹津親姪唆令羅卜藏丹津叛
逆又令伊等喇嘛與我兵交戰雖勢窮來投情難姑恕到日臣卽
行正法報聞○庚申予故原任工部右侍郎王懿祭葬○辛酉年
羹堯奏賊人來侵布隆吉爾地方參將孫繼宗遊擊孫超節領兵
往迎遇賊三千餘人正交戰時副將潘之善引兵繼至併力奮擊
殺賊甚眾所獲器械無算報聞○壬戌宗人府奏履郡王允禩受

皇上深恩不敬謹辦事每思推諉應革去郡王降授輔國公得旨允禩自封王以來並不感激效力著革去郡王仍在原固山貝子上行走○禮部議覆浙閩總督覺羅滿保奏西洋人在各省起蓋天主堂潛住行教人心漸被煽惑毫無裨益請將各省西洋人除送京效力外餘俱安插澳門應如所請天主堂改爲公所誤入其教者嚴行禁飭得旨西洋人乃外國之人各省居住年久今該督奏請搬移恐地方之人妄行擾累著行文各省督撫伊等搬移時或給與半年數月之限令其搬移其來京與安插澳門者委官沿途照看送京毋使勞苦○復設江南雲臺山東海營以海州營守備移駐增把總一兵百六十六名○設立廣西太平土州縣以養利州訓導一員移駐○乙丑賜李琰等一百三十六人武進士及第出身有差○丁卯冊立嫡妃那拉氏爲 皇后封年氏爲

貴妃李氏爲 齊妃鈕祜祿氏爲 熹妃宋氏爲 懋嬪耿氏爲

裕嬪翌日頒詔天下覃恩有差○癸酉年歲堯奏西甯一帶番

賊俱經剿滅惟南川口外郭密九部肆行截搶臣廣行招撫有沙

克都爾阿拉布坦率三部來投其餘部落仍行恣肆其呈庫活爾

賈二部暴戾尤甚岳鍾琪帶來瓦斯雜谷之兵熟習山路臣前令

岳鍾琪在歸德堡將上寺東策布下寺東策布之助惡賊番剿撫

兼施俱已安插卽移師進剿郭密番賊搜捕賊穴將呈庫一部攻

殺殆盡活爾賈等部首惡已誅其餘盡皆投降報聞○是月免直

隸開州等二十二州縣康熙六十年旱災江南海州溧陽太倉等

二十七州縣衛旱災河南中牟等十縣水災額賦有差○是歲朝

鮮琉球來貢○會計人丁戶口二千五百三十二萬六千三百七

又永不加賦滋生人丁四十萬八千五百五十七田地山蕩畦地

八百九十萬一千八百七十九頃六十二畝有奇徵銀三千二十
二萬三千九百四十三兩有奇米豆麥四百一十二萬八千六百
五十七石有奇草四百八十二萬七千八百六十一束茶四十九
萬五千六百二十引行鹽五百二萬四千一百三十八引徵課銀
四百二十六萬一千九百三十三兩有奇鑄錢四十九萬九千二
百有奇